



2. august 2011

UKA 2011/55

Inatsisartut suleriaasianni § 36 naapertorlugu, matumuuna oqaluuserisassamik imaattumik siunnersuuteqarpunga:

Inatsisartut Inatsisaat nr. 7, 7. december 2009, Aatsitassat ikummatissallu pillugit inatsisaani immikkut isiginiarlugu § 3-p allanngortinneqarsinnaanissaa siunertaralugu oqallisissiaq tunngavigalugu Inatsisartut oqallinnissaanik siunnersuut
(Inatsisartunut ilaasorta, Naaja Nathanielsen, Inuit Ataqatigiit)

Tunngavilersuut

Naalakkersuisut nalunaarutigisimavaat, qinersiviup matuma ingerlanerani Inatsisartut Inatsisaat nr. 7, 7. december 2009-meersoq, ulluinnarni ”Aatsitassat Ikummatissallu pillugu Inatsimmik” taaneqartartup allannguutissaanik saqummiussaqaqarumarlutik.

Tamatumunnga tunngatillugu paasisaqarfigissallugu soqutiginarlippara, partiit assigiinngitsut aatsitassat pillugit inatsimmut qanoq isumaqarnersut – inatsit iluarisimaarneqarpa imaluunniit allannguuteqarnissaa kissaatiginartinneqarpa? Inatsit sukangavallaarsorineqarpa, sukatertariaqarpa imaluunniit ilassuteqartinneqartariaqarnerpa?

Uanga isumaga naapertorlugu soqutiginarluutippara § 3-p allannguuteqarsinnaanera pillugu oqallittoqassappat, imaammatt: ”Aatsitassat pillugit Oqartussaaffeqarfik Naalakkersuisut ataanniittoaq tassaavoq aatsitassat pillugit ataatsimoorussamik aqutsisoqarfiusoq (...)”. Imm. 2-mi allaqqavoq Naalakkersuisut pisussaaffigigaat, aatsitassat pillugit oqartussaaffik il.il. ingerlattanullu attuumassuteqartut allat oqartussaasutut akuleriissitsilluni ataatsimoortillugit suliarineqarnissaat Naalakkersuisut isumagisavaat. Taamaasilluni pineqarpoq ”pisiniarfik ataasiusoq” naapertorlugu ilusiligaq, tassalu allaffissornikkut pisortat sinnerlugit aqunneqarnera oqartussaaffimmit ataatsimit, tassalu Aatsitassat Pillugit Pisortaqarfimmit isumagineqassasoq.

Allatut aaqqiinaraani periarfissaavoq ”matu ataaseq aqutigalugu” aaqqiisoqarsinnaanera, tamatumani Aatsitassat pillugit Pisortaqarfik tassaassasoq ataqatigiissaarisoq imaluunniit saaffiginnissutinik tigusisuusartoq, qinnuteqaatit tamaasa eqqarsaatigalugit. Tassanngaanniit tamakku susasaqartunut ingerlateqqinneqartarsinnaassagaluarput. Tamakku ataatsimoortumik inissisimasinnaapput imaluunniit immikkoortortatut arlalittut aaqqiivigineqarsinnaallutik. Tamarmik inatsisitigut Aatsitassat pillugit Pisortaqarfik naligisutut suleqatigissagaluarlugu. Taamatut ilioraani periarfissaqalissagaluarpoq soorlu immikkoortortat marluit pilersinneqassagaluarlutik, Nakkutilliinermut Immikkoortortaqarfik imaluunniit Avatangiisinullu immikkoortortaqarfik immikkuullarissumik inissisimatinneqartoq.

§ 3 allanngortinneqaraluarpat, tamanna imaangilaq aatsitassaqaqarneranik misissuiniarnerit imaluunniit piaanissamut akuersissutit ikilinerinik kinguneqarumaartoq. Tassami Aatsitassat pillugit Inatsisip maannangaaq avatangiisinut nakkutilliinissamullu piumasaqaatit sakkortuut atuutilersereernikummagit. Kisiannili § 3-p allanngortinneratigut immikkoortut ataasiakkaat inuiaqatigiinnut pingaaruteqassusiat ersersinneqarsinnaassagaluarpoq, taamaasillunilu inuiaqatigiittut avatangiiserput massakkullu pisunut nakkutilliinissarput pingaartitarigippat naqissuserneqaannassagaluarpoq. Tamatumali saniatigut aamma inuiaqatigiittut

pisinnaatitaallutali pingaartitsisuusugut aatsitassat pillugit inatsisimmik
ineriartortitsinissatsinnik, tamakkunungalugu inatsisigut aamma taamak isigigivut.